

THE MALAYSIAN INSTITUTE OF CERTIFIED PUBLIC ACCOUNTANTS
(INSTITUT AKAUNTAN AWAM BERTAULIAH MALAYSIA)



Chartered
Accountants
NUMBER ONE IN NUMBERS



KERATAN AKHBAR

PENERBITAN : Bernama (Wireless)
SEKSYEN : Ekonomi
TARIKH : 24 Februari 2009
TAJUK : **Kerajaan Terus Beri Penekanan Pembangunan Modal Insan**

KUALA LUMPUR -- Kerajaan akan terus memberi penekanan kepada pembangunan modal insan menerusi kualiti pendidikan dan prasarana latihan yang bertambah baik bagi pertumbuhan masa depan, kata Menteri di Jabatan Perdana Menteri Senator Tan Sri Amirsham A. Aziz.

Beliau berkata ini adalah penekanan yang sesuai bagi menggerakkan ekonomi untuk meningkatkan rantai nilai dan mengekalkan pertumbuhan serta daya saing jangka panjangnya.

"Modal insan merupakan prasyarat bagi negara untuk memacu ekonomi berasaskan pengetahuan, membangunkan tenaga kerja yang mahir dan berpengetahuan," kata Amirsham dalam ucap tamanya di majlis permeterian Memorandum Persefahaman (MOU) antara Chartered Accountants in Australia (ICAA) dengan Institut Akauntan Awam Bertauliah Malaysia (MICPA), di sini, malam ini.

MoU itu dimeterai oleh Ketua Pegawai Eksekutif ICAA Graham Meyer manakala MICPA diwakili oleh presidennya Datuk Nordin Baharuddin. Amirsham menyaksikan majlis pemeteraian tersebut.

Amirsham berkata dalam tempoh sederhana hingga jangka panjang, usaha bagi mempercepatkan pembangunan modal insan akan meningkatkan produktiviti kepada pertumbuhan ekonomi negara.

"Pengurusan ekonomi baharu memerlukan kita membangun dan mengekalkan modal pengetahuan. Kita perlu membangunkan modal insan berkualiti yang mempunyai prospek dan pemikiran yang komited untuk mencapai dan mengekalkan kecemerlangan.

"Bagi membolehkan kita melakukan semua ini, kita memerlukan sokongan asas sebuah sistem pendidikan nasional yang efektif yang mampu mengekalkan standard pendidikan tinggi pada semua peringkat pembelajaran dan pengajaran," katanya.

Beliau berkata pendidikan berkualiti merupakan ramuan penting bagi pembangunan modal insan yang berkualiti.

MOU antara ICAA dengan MICPA itu akan menyediakan akses kepada pelajar bagi peperiksaan profesional kedua-dua badan perakaunan itu.

Presiden MICPA, Datuk Nordin Baharuddin berkata dengan termeterainya MoU itu menandakan satu pencapaian penting MICPA dalam usahanya untuk mengembangkan lagi sayapnya di peringkat global dan membuka era baharu hubungan profesional bagi institut tersebut.